

Una bella poesia de Giuanni Maxia

S'incravau

Su poeta casteddargiu, binchidore de su premiu de Leofonte a livellu istatale, nos at mandau una bella cantzones de sas suas.

S'incravau

de Giuanni Maxia

Seu deu,hoi,Deus,s'incravau...
Seu deu,hoi,Deus,su malassotau!
Seu deu,hoi,Deus,su disisperau,
for'e tribagliu e senz'e pecau.
Seu deu,su disamparau,
s'anima morta tocada in costau.
Deu,ch'in su sonu de boxis de gherra,
in contos de laras biancas che nie,
in contos de caras fatas a perras
de spantu ischidadas a noti e a die
dae putzus fundudus de ogus in terra,
bivu in sa tirria de sa tirannia,
e mandigu pani cun tribulia,
e a bibere abba cun timoria.
Seu deu,hoi,Deus,s'incravau...
Seu deu,hoi,Deus,su malassotau!
Seu deu,hoi,su frastimau...
For'e forredda po mi callentai,
ca finas de domu mi nc'hant 'ogau
e pani cun frius depu papai.
Seu deu,hoi,Deus,s'incravau...
Seu deu,hoi,Deus,su malassotau!
Seu deu,hoi,su desaparessiu,
nemus m'hat mortu,nemus m'hat biu.
Una die de domu mi nd'hant leau,
mancu su tempus de chistionai...
sentz'e chi nemus m'hapat agiudau
hant cumentzau a mi torturai.
E lampus, e tronus, e furcas e ispinas
(chi fiant atru che follas de lau,
chi fiant atru che murtas divinas)
in mesu momentu seu desaparessiu
e nemus m'hat mortu e nemus m'hat biu.
Seu deu, hoi,Deus, s'incravau...
Seu deu,hoi ,Deus,su malassotau!

de Giuanni Maxia